

四庫全書

史部

欽定四庫全書

欽定曰下舊聞考卷九十七

郊垌

西七

原慈壽寺去阜成門八里聖母慈聖皇太后所建蓋正
德間大璫谷大用故地經始于萬歷四年凡二歲告成
入山門即有窄堵波高入雲表名永安塔華煥精嚴蓋
慈聖既捐帑各郎復助之因得速就如此

野獲編

臣等謹按慈壽寺及塔

本朝乾隆二十二年奉

勅修葺塔下碑亭二左碑前刻紫竹觀音像并贊明萬
厯丁亥年造後刻申時行許國王錫爵瑞蓮賦右
碑前刻魚籃觀音像贊同左後刻關聖像并贊明
春坊諭德兼侍讀南充黃輝撰萬厯辛丑年立殿
內恭懸

皇上御書額曰梅檀寶地殿後為閣簷端恭懸

御書額曰香雲閣聯曰智珠朗映光明藏意藻常舒歡

喜園

原慈壽寺在阜成門外八里宣文皇太后所建成于萬
歷六年秋殿宇壯麗一塔聳出雲漢四壁金剛像如生

湯幢
小品

原八里莊慈壽寺神宗為慈聖皇太后建也寶藏閣係
聖母御筆題稍西一道觀世宗時極盛今頽楹殘礎滅
沒于荒榛翳莽中矣

燕都遊
覽志

原萬歷丙子慈聖皇太后為穆考薦寘祉神宗祈嗣卜

地阜成門外八里建寺焉寺成賜名慈壽勅大學士張居正撰碑時瑞蓮產于慈寧新宮命閣臣申時行許國王錫爵賦之碑勒寺左寺有永安壽塔塔十三級聳雲中中為延壽殿後為寧安閣閣扁慈聖手書後殿奉九蓮菩薩太后夢中菩薩數現授太后經乃審厥象範金祀之

帝京景物畧

臣等謹按張居正所撰碑今已無存至孫國救燕都游覽志謂寶藏閣為慈聖手書劉侗帝京景物

畧謂寧安閣為手書紀載互異今諸閣已廢無可
考姑並存之以闕疑

原九蓮菩薩者孝定皇后夢中授經者也覺而一字不
遺因錄入大藏中旋作慈壽寺其後建九蓮閣內塑菩
薩像跨一鳳而九首寺僧相傳菩薩為孝定前身也

玉堂

舊記

臣等謹按寺內香雲閣下東偏今供像一尊高尺
餘有跨鳳九首之形

原張居正勅建慈壽寺碑略 寺在都門阜成關外八里聖母慈聖宣文皇太后親出供奉今委太監楊輝董其役外為山門天王殿左右列鐘鼓樓內為永安壽塔中為延壽殿後為寧安閣旁為伽藍祖師大士地藏四殿繚以畫廊百楹禪堂方丈三所又賜園一區莊田三十頃食僧衆以老僧覺淳主之中官王臣典領馬寺成名之曰慈壽 太岳集

原于慎行勅建慈壽寺碑畧 聖母慈聖皇太后與皇上永懷穆考在天之靈思創福地以薦冥祉乃命內臣卜地于阜成門外八里得太監谷大用故地一區遂出宮中供奉金潞王公主宮眷內侍各捐湯沐經始于萬歷四年二月至六年仲秋既望落成賜名曰慈壽蓋以為聖母祝也 穀城山房集

原陳萬言慈壽寺詩 帝城門外制舍衛國中臺初地三摩入慈宮萬壽開午鐘招雉雀夜雨積莓苔怪底花間客浮名逐夢來 鉅園集

原公薨慈壽寺詩 郭外浮圖插太虛
空王臺殿逼宸居
蓮花座與青山對
貝葉經傳白馬餘
燕地風沙飄客淚
漢朝陵墓想壘與鄉
闈有夢腸堪斷
東望誰傳尺素書
卜東園詩集

原慈壽寺傍有菴曰摩訶菴不甚大潔淨特勝他菴殿
前後多松檜四隅各有高樓疊石為之登樓一望川原
如織西山蒼翠欲與人衣袂接右即法藏菴為摩訶別
院僧無鉉所剏無鉉善琴

長安客話

臣等謹按摩訶菴法藏菴今並存

原摩訶菴嘉靖丙午建也菴有樓以望西山天啟中魏

璫過菴下偶指樓曰宜去之即曰毀其西有大勝菴帝京

景物
畧

臣等謹按摩訶菴石樓東南北三面今尚存獨缺其西一面菴僧云即魏忠賢所毀也

補出阜成門西行三里許有報恩寺又西三里靈佑觀又西為廣福寺又西為嘉祥觀又西為元應觀入八里莊堡為摩訶菴又西為永慶寺又西為慈壽寺又西為元福宮嘉祥觀多松入門二株尤秀潤摩訶菴前殿有

碑二碑文左為鉛山費尚書家撰右為華亭孫尚書承
恩撰俱嘉靖二十七年立殿後右廂有竹一叢院中雜
詩草花堂懸萬物育墨跡三字上用恭穆獻皇帝睿筆
璽下有嘉靖年製小印堂後松二株高出殿脊其後則
中官趙政墓也元福宮建于正德五年至天啟五年重
修中有蒼松四株最奇古後殿三清六真像皆范銅為
之配殿文昌與夾侍童子亦銅像旁鑄一騾銅質光潤
絕似宣德鎔金薰鑪色殿前後凡四碑一仆二為人磨

欽定四庫全書

卷九十七

去止存中書舍人袁志學一碑崇禎元年所立也

人海記

臣等謹按報恩寺今存靈佑觀今改名無量庵詳

前郊西卷五摩訶庵費孫二碑存明世宗墨跡已佚嘉祥觀元應觀永慶寺元福宮及文昌殿銅像

俱廢

補宣德年鑄黃鑪海內所珍今多廢物真者百之一耳
市者一鑪索數十金卒難得其佳者慈壽寺西有元福
宮文昌祠前銅鑄一騾傳是宣德年所造游人以手摩
挲銅質呈露其色甚瑩驗騾之質亦可辨鑪之真贋矣
改過齋雜記

補志學重修元福宮碑畧 國家庖爨薪產自馬

鞍山八里莊為中道而無停宿之所太監王文政用價
五千兩贖得武清侯地三十頃東至摩訶菴南至釣魚
臺西至兩家店北至張花村而元福宮在其內于是建
立棧柴停宿公廨元福宮重加修葺焉 素舍人集

臣等謹按據袁志學記文元福宮當在摩訶菴迤

西而故址已湮惟兩家店地名仍舊張花村則無考矣

增摩訶菴東偏金剛殿壁有明人重臨集篆三十二體

金剛經石刻

五城寺
院冊

臣等謹按金剛經集篆三十二體石刻每經一章

為一體每體標以分書而附以釋文明陳萬言跋

又

國朝王崇簡跋謂宋僧道肯因五代時僧夢英所集十八體而廣之明黃梅汪可受得浮篋中舊本于黃蓮洲門人黃梅洪度重臨付梓萬厯間庶吉士雷城侯恪朱繼祚姚希孟何吾騁施兆昂陳萬言行人司行人周鏘河南提學副使呂邦耀吏科給事中姚宗文學使黃汝亨掌河南道事監察御史房壯麗等為書釋文于後而勒諸石摩訶菴僧性宏

嵌之金剛殿壁迄今字畫完好

補費宋庠所創也在宛平縣香山鄉八里莊正殿一左
太監趙政所創也在宛平縣香山鄉八里莊正殿一左
右配殿廊廡方丈旁舍凡九十經始于嘉靖二十五年
正月竣事于明年閏九月菴之地為畝三十園圃之地
為畝二頃五十餘費文通集
增陳萬言金剛經集篆畧金剛經之有集篆也宋
僧道肯因五代僧夢英所集十八體而廣為三十二者
也篆經之有刻本也汪中丞靜峯獲之黃蓮洲命其門
人洪度臨摹壽木者也木本之翻而為石也徐中丞雅
池及其長公公穆為庠菴作一大事因緣而余適觀
成者也會篆後將釋以正書菴僧性宏出黃太史續軒
所書金字經一卷余擬為手書諸石一時臨池名手爭
願以筆墨緣販依法寶而余偕同館諸君子圓滿勝因
亦一快也工竣性宏謀續構石經室而藏之因為識其

先後刻經大畧時天啟初元閏春十有一日
原黃鳳翔宿摩訶菴詩 賦風卷落照倦鳥棲故林獨

坐招提中悠悠我心徘徊不能歸借榻紆長吟小牖
月華入疎闌雲氣深中庭有孤松清霄騰梵音人世日

代謝幽懷無古今續紛逐塵者羈縻空陸沉僕夫休戒
曉吾意欲投簪 黃宗伯集

原馮琦同于宮諭飲摩訶菴南園步至釣魚臺夜眺還
宿法藏寺紀事 如是招提境殊無衢陌塵雨過林尚

滴香雜苑猶春水竹和歌鳥涼風為酒人莫頻移坐榻
深惜此花苗 蒼蒼望不斷小徑亦何深未盡塵中務

難為郭外心如雲千樹色有日半山陰漸與祇林遠鐘
邊無磬音 共此魚梁約壺觴夜自攜野雲來坐冷林

月向人低烟帶遠山合天將草樹齊薄霜晞易得有路
更前溪 帝京景物畧

增高士奇摩訶菴看杏花詩 青郊路轉見芳菲日暖
園林燕子飛別園乍驚山杏落僧厨新煮藥苗肥繁花

舞蝶迎人面
細草輕烟上
客衣更向層
臺高處望
千峯螺黛送春暉
城北集

增永慶禪林在摩訶菴之西舊名法藏菴

臣等謹按法藏菴碑二皆按察副使都人劉效祖

撰嘉靖戊申季秋立

原馮琦宿法藏菴詩
妙諦聞龍藏清談過虎谿更從
雙樹杪借我一枝棲法界心常淨
名琴手自攜曲終人
境寂殘月竹房
西
北海集

增闢帝廟在恩濟莊路東
院五冊城寺

臣等謹按雍正十二年

世宗憲皇帝賜內監等塋地一區名恩濟莊並於其地
勅建關帝廟於乾隆三年二月落成殿內額曰威靈普
護碑一戶部尚書海望撰乾隆五年七月立

增十里莊有慈育院慈集寺定慧寺

五城寺
院冊

臣等謹按慈育院舊稱碧霞元君廟康熙四十六
年奉

勅修建改今名正殿恭懸

聖祖御書額曰慈育羣生聯曰弘育羣生敷愷澤順承

坤德霽慈雲後殿額曰大悲壇殿內額曰鹿苑星
龕聯曰水月應從空法相天花故落暎星龕門外
坊

世宗御書額曰靈光昭垂乾隆十五年重修翰林院侍
讀學士王際華撰記立石慈集寺門額

聖祖御書定慧寺初名善法後改名雲惠

本朝康熙四十一年

賜名定慧寺門額及天王殿額皆

聖祖御題後殿內恭懸

聖祖御書額曰慈雲廣覆檐前聯曰覺路弘開慈航普
度三千界法輪廣照佛日長輝億萬年碑三一明
翰林院修撰閻三山翁正春撰萬厯二十七年立
一大學士南海梁儲撰正德六年立一為

本朝翰林院侍講學士勵廷儀撰康熙五十一年立

增十里莊西半邊店有報誠寺普同菴

五城寺
院冊

臣等謹按報誠寺寺門額識正德戊寅年五字磬

一鑄崇文門外古剎普賢菴住持定圓造大佛殿
磬一口重一百斤上祝萬壽成化庚寅仲冬等字
又普同菴鑪一萬歷四十三年造

增田村有靈威觀音菴三官廟寶峰菴

五城寺
院冊

臣等謹按靈威觀音菴鐘一明嘉靖四十一年造
磬一正德六年造三官廟碑二一明翰林院編修
陳元暉撰萬歷四十四年立一閭先格撰

本朝康熙五十二年立寶峰菴碑一明吏部尚書南海

梁儲撰正德十二年立

增顯應寺在阜成關外香山鄉黃村

五城寺院冊

臣等謹按顯應寺

本朝康熙五十八年因保明寺舊基修建觀音殿內恭
懸

聖祖御書額曰水心柏子聯曰片石孤雲窺色相清池
皓月照禪心老祖殿額曰林泉花雨聯曰月在上
方諸品靜心持半偈萬緣空寺後閣額曰挂衲翻

經寺門額曰

勅建顯應寺又天王殿亦有顯應寺三字額皆

聖祖御書老祖殿前恭立

聖祖御製顯應寺碑清漢書各一漢書詹事府左春坊

左庶子兼翰林院侍讀王圖炳奉

勅書觀音殿右仆碑一明時重修皇姑寺記無撰人姓名左為勅諭蠲免糧稅碑弘治十二年六月立

增

聖祖御製顯應寺碑 都成之西有佛舍一區寂自前
明中葉雖歷加修葺而歲月寢久復燬于火舊規既替
香界就荒非所以崇像教廣禪悅也朕以古剎勝因宜
規整飭爰發帑金鳩材董役經始于康熙五十年十二
月落成于五十八年正月不庠不侈棟宇一新答士庶
敬信之忱慰緇流皈依之願用錫嘉名顏為顯應蓋以
慧炬祥光無微不顯慈雲法力有感必通澤萬品于真
源耀十空于實智同圓妙果長稔福田云爾

原宛平縣西黃村有勅賜保明寺寺中尼呂氏陝人正統間駕出關尼送駕苦諫不聽及上還轅復辟念之乃建寺賜額人稱為皇姑寺

耳譚

臣等謹按今顯應寺左有屋數椽尚懸保明寺額內為女僧呂氏塋塋前有嘉靖四年勅賜碑載呂氏陝西西安府邠州道安里王壽村人碑後並刻有像

原順天保明寺是比丘尼焚修處寺建自呂姑正統間諫

阻北征不聽後復辟念之封為御妹建寺賜額藏天順

手勅三道有寺人司戶人不易入

燕都游覽志

原皇姑寺在京城西山不知所始嘉靖六年丁亥上諭輔臣楊一清云前有旨下部謂尼僧與僧道不同而尼僧寺與僧寺道觀又不同今因桂萼奏毀尼寺已行下矣今若皇姑寺仍留是不去其根也乃旨出之後三四日不知何日哀奏兩宮皇伯母見諭以皇姑為孝宗所建似不可毀聖母亦以孝宗為言蓋小人進禍福之言故兩宮一時傳諭次日聖母又諭欲建一寺即將此寺與我亦好蓋此寺乃皇親內宦供給信施必有請告之者矣按世宗此旨已洞見宮掖隱情既而聖諭又下輔臣楊一清等曰慈訓兩頒宜即順命但懲惡須去本方免後患今將此寺房留與無歸尼僧暫住止著終身不許復引其類其祖宗時所賜勅額追回此旨既下其後

因循至今又八十年矣尼僧之增日多宣淫日盛擅施亦日益不貲矣蓋其根株既在內廷以世宗英斷尚不能離除況後世乎自丁亥後又十年而霍文敏韜為南禮卿首逐尼僧盡毀其菴金陵一片地頓爾清淨霍去而尼復集菴復興更倍往日矣是時上又密諭閣臣云朕又將有議此寺額名之意并告卿知夫順天保明者明是我朝國號此言尼僧之祖能順聖祖奉天開極此惟皇天命之何待後日以一妖尼能保我明也哉又云皇姑者尤不好聽言我皇家之姑也當時此寺云勅賜不云勅建便可見非祖宗本意也故朕深嫉之因與卿密知之觀世宗屢諭不特明晰事理且曲揣人情真是禹鼎秦鏡且開諭弼曲從兩宮之意然于實錄中僅載一二語不能如此詳明不知述史者何所諱也予今所紀亦僅十之四五耳 野獲編

朱彝尊謹按山東濟南長清縣之長城堡亦有皇

姑菴覽其遺碑具載呂姑諫阻裕陵北征本末碑
稱姑山東人與諸書所紀不同未詳孰是

增闡帝廟在顯應寺西

五城寺院冊

臣等謹按廟勦于康熙五十二年前供馬王像後

為闡帝殿殿門恭懸

聖祖御書額曰忠義伏魔乾隆十八年重修工部侍郎

德保撰記立石

增黃村下莊迤西路北有福田寺

五城寺院冊

臣等謹按福田寺已圯僅存碑二左碑明大學士
葉向高撰天啟四年立右碑惟列修建人姓名

原萬厯四年西竺南印土僧足克戢古爾東入中國初
息天寧寺後過阜成門外二里溝見一松盤覆趺坐其
下默持陀羅尼咒匝月不食僧耳環手鉢紅剎衣蒼紫
面而髯鬢肖古達摩相畢常侍奏之賜織金禪衣賜日
齋萬僧賜酥燃燈賜松地居焉賜寺名西域雙林寺

帝京

景物畧

按足克戢唐古特語首飾也
古爾帳房也舊作左吉古魯今譯改

臣等謹按雙林寺碑一明萬厯四年工部右侍郎王槐撰今存佛殿三重前二重本寺僧衆居之後殿奉瑪哈噶拉佛以處西域梵僧別關門于寺左側

原萬厯初大璫馮保營葬地造寺曰雙林雙林馮之別字也穀城山房集

補梵僧索諾木納木結能為漢音詰其西來踐歷蹤由云其國名卓哈近高昌出家法藏寺本周天元時甘露梵王剎東行九萬餘里始達五臺山逢御馬監太監劉潤引至北京雙林寺住萬厯三十年明肅皇太后命住

萬壽菴又三年看經廠太監張貴引奏命住雙林寺賜紫衣寶冠命西經廠掌壇教授中貴又賜織金禪衣金段膳盒等物六研齋筆記按索諾木納木結蒙古語有福人也舊作鎖喃嚷結今譯改卓哈舊作主活照三史畫一改正

增雙林寺三大士西番像相也相皆裸而跣有冠有裳有瓔珞執象獅各出其座下中金各色勇猛丈夫也五佛冠上二手交而杵鈴跌而坐左右各藍色三目彩眉耳旁二面頂累二首項腰各周以鬘髻而帶以蛇左喙鼻耳角牛也三十二臂一十六足中二手交把鬘髻串額而鎗取其腦其三十手所執械旗幡鼓鈴牌金火輪繩樞杵刀叉鐮劍鉞鐵弓矢其所執殘者為身頭手足肉骨血淋漓皆新其有陳者髑髏也足左踏皆若鳳右踏皆若馬各有人金冠合掌腰腹承之其一人兩手拍捧而悲也右魔王鬼神像也其耳環一十六臂而四足手二交而托十四仰而托托皆噉布拉碗左之碗盛菩薩

右威虎獅象駝犀海馬噉布拉碗者解頂顱骨而金絡
轉稜尖如蓮房也足踏人四色前仰後伏殿壁所編繪
亦十方如來示現忿怒尊者像也有韃人草其面爪趾
宛然者有倒絡人首而為纓蹬鬲腰口而為鏡者有戴
人面首若獵而狐兔雉羆者有尸三刃穿有戟三首貫
者有方噉人半身而披髮垂于吻者其計令瞻而衆怖
思而猛省歟忿怒變像烏斯藏每貢之曰瑪哈噉拉佛
寺後一土山山前一塔旁皆朱櫻 帝京景物畧 按
噉布拉蒙古語天靈蓋
也舊作葛巴刺今譯改

臣等謹按雙林寺後殿三大士及繪壁諸變相一
如帝京景物畧所云獨中像舊稱面金色今白色
此為小異耳寺後明陽洞臺榭朱櫻今皆無存惟

土阜隆起畧具山形而已塔僅存其半前後左右

復有僧塔十餘

增王槐雙林寺碑畧西直門外有闕一區梵僧佐
克吉古嚕先寓天寧寺次詣此見地勢靈秀松茂張蓋
遂憩息松下結趺坐耳環手鉢貌若遼摩曰吾西竺
南印土方僧遊化中國耳遂留受供其後一月不食默
坐持誦密咒聞于慈聖皇太后皇帝賜織金禪衣錢錠
日齋萬僧仍賜酥油燃燈師齋曰滿期即欲辭去曰此
菴未足以綴佛聖建一大寺奉三寶是吾之屬也寺前
為山門金剛鐘鼓二樓天王殿宇中為佛殿左右伽藍
護法後為方丈左右齋堂禪室兩側廚庫僧房其後疊
土石為山高可丈餘上為明陽洞左臺右檄羣卉叢萃
凡寺之所宜有者無不備矣工始于二月之春落成于
八月之秋命名雙林萬歷四年歲次丙子孟秋之吉

原于慎行雙林寺歌
道旁佛宮誰者築珠樓寶殿橫

山麓僧徒指點為予說
此寺方成主人逐憶昨十載氣

薰天吐納日月揮雲煙外廷稍引三公勢
內禁親操六

璽權出入鈎陳留筦鑰笑譚田觀走金蟬
建寺平侵貴

主地施僧直請大官錢輪來多寶堆成塔
葦盡黃金布

作田法宮梵宇何連曼勝地名區看不斷
墓上林園學

九陵祠前樓閣成雙觀落成牛酒國親供
建醮香花天

女獻吁嗟此寺獨渺小赤刀已欲盈千萬
我皇神威符

世祖距脫大奸俯地取郭家金穴入水衡
鄧氏銅山歸

少府廬免解玉乞街衢宅婦懷簪隨卒虜
惟餘此寺在

郊原虹梁綺構誰為主蛛網空懸梵鐸風
青苔自鎖瑤

瑯兩盛衰轉盼那不有幾年翻覆看如許
君不見江陵

城頭土三尺若教餒鬼不來食一代賢豪

此謂何爾全首頌恩已極穀城山房集

原馮琦雙林寺歌
長安春風能幾許陣陣化作秋來

雨蒼狗白衣那可辨古今榮瘁寧堪數
君不見元明官

君不見雙林寺雙林寺主跡如埽
路人猶說繁華事憶昔金貂近帝樞
轉日回天傾上都九列有時闕進退五
侯無敢同馳驅縱橫五鹿客交結霍家
奴城中甲第連白虎城外浮圖卞赤烏
浮圖矯矯凌雲際乘豹駝狸闢神異天
中畫棟盤龍螭階下豐碑蹲鼎鬬天子
親為降勅書宰相不惜書名字布金刻
玉神亦妨釁血塗膏鬼所忌從來執權
如批虎黃鉞一下無處所半夜雷霆飛
赤霄百萬金錢歸少府罪厚難徵帝釋
靈譴輕未霽君王怒大第深沉別有人
野寺淒涼已無主試看今日蓬與蒿試
看舊日石與牢豪華意氣竟何在寂寞
樓臺空復高黃金臺前車已覆黃金塢
中滿已撲何處流人泣向隅何人貴近
欣當軸一度花開一度春一年世事一
回新惟有寺前松栢樹年年長對往來
人北海集

原興教寺在雙林寺東成化二十一年建以居大興法

王嘉勒幹凌戩者

帝京景物畧勝也凌戩義俱

按嘉勒幹唐古特語見前舊作結幹領占

今譯改

臣等謹按興教寺舊址惟餘仆碑二一鐫成化間

賜勅一列叙部劄為正德間刻石者

增興教寺成化勅旨碑朕惟佛氏之教流傳中國已久化導羣品開悟迷途功德所及宜顯之問哉好善之士崇奉之者一惟謹耳寺在都城西直門外司設監太監王助存日贖宛平縣民黃昇等地建修以為祝釐之所其界東至义道南至大道西至觀垣北至河岸又建立寶塔一座于內朕已賜額曰興教今助已故特賜為大興法王嘉勒幹凌戩焚修之所國師扎巴藏布為寺提督講經索諾木巴勒丹兼住持都綱章台揚札巴

為佳持朝夕領衆焚修所贖昇等田地一項五十八畝五分該徵糧草悉令有司除豁仍與寺管業嘉勒幹凌戡恐年久被人侵占乞換勅護持茲允其請頒給之自今凡官員軍民諸色人等毋得侵占田土及侮慢欺凌以沮壞其教敢有不遵朕命者論之以法故諭成化二十一年六月二十九日按扎巴唐古持語徒弟也藏布義見前舊作劄巴藏播今譯改章台揚札巴舊作章臺陽吃巴今對音譯改

原雙林寺西二里有神虎橋橋四石虎萬厯中一虎夜

逸遂名三虎橋

帝京景物畧

臣等謹按神虎橋三虎今尚存

原至元七年二月築昭應宮于高梁河

元史世祖紀

臣等謹按昭應宮遺址在雙林寺之西今長河又在其西北相距半里許元史稱在高梁河者殆以其地勢相近故約畧言之耳

原大德五年二月賜昭應宮地百頃

元史成宗紀

原昭應宮在雙林寺西元至元中建龜蛇兆焉正德八年修蛇復馴出赤質黑章金文爛然大學士費宏碑文

記之

帝京景物畧

臣等謹按昭應宮久廢費宏碑亦無存矣

補元宮人王金蓮晚為道士提點昭應宮卒贈淵靜元
素真人表摘草其制 查浦輯聞

原馬中錫過昭應宮詩 翠濕松稍露滴珠洞門下馬
獨躊躇丹成勾漏知何在花發元都恐未如游客漫勞
題鳳字道人喜換驚書分明也住人
間世偏自相逢說步虛 東田漫稿

欽定日下舊聞考卷九十七

欽定日下舊聞考卷九十七舉正

文昌祠前銅驪原書驪誤作驢與人海記所載異今

改宣德年鑄
薰鑪條

欽定日下舊聞考卷九十七舉正

欽定四庫全書

欽定日下舊聞考卷九十八

郊垌

西八

增元京城門西之北曰和義明改和義曰西直

大清
一統志

臣等謹按西直門之名始自明永樂中

本朝因之門外修治石道西北至

圓明園二十里每歲

聖駕自

宮詣

園凡

蹕路往來因事攄懷忠昭垂於篇什茲謹載其始見之

章至凡一事而

屢垂藻翰則有

御製詩全帙在例不具錄

增乾隆十年

御製西直門外詩 良苗近隴復遐町一雨能迴五穀

青今日輕輿憑覽處稍紆半夏刻靡寧 晚田稻可冀
豐還瞻望每每一解顏不為沽名勤望歲樂憂此外更

無闕

原蔣山卿出西直門望西山詩 路出西郊外尋幽興
已賒徑迴迷落日林合隱疎花山色爭迎馬湖光欲泛
槎翠微多少寺處處足煙霞 南泠集

補孫樓郊西詩上苑春偏麗西郊更可憐輕塵花半妥斜陌
柳初眠綠樹鶯聲外青山馬首前夕
陽南北淀彷彿太湖山 百川集

增西直門外石道轉北有演梵寺瑞像菴

五城寺
院冊

臣等謹按演梵寺鐘一明萬厯年間造瑞像菴有

舊佛像

原薊東一十里有高梁之水

魏氏土地記

臣等謹按高梁河為玉河下游玉泉山諸水注焉

高梁其舊名也自高梁橋以上亦謂之長河詳見
苑園門

原濕水又東南高梁之水注焉水出薊城西北平地泉
東注經燕王陵北又東逕薊城北又東南流入濕水俗
諺云高梁無上原清泉無下尾蓋以高梁微涓淺薄裁

足津通憑藉消流方成川圳清泉至潞所在枝分更為

微津散漫難尋故也

水經注

原斛律羨轉使持節都督幽平營東燕六州諸軍事幽州刺史導高梁水北合易京東會于潞因以灌田邊儲

歲積轉漕用省公私獲利焉

北齊書本傳

原遼乾亨元年七月耶律沙等及宋兵戰于高梁河小卻耶律休格珍珍橫擊大敗之

遼史景宗紀

原至順三年三月以帝師汎舟于高梁河訓衛士三百挽舟

元史文宗紀

原大城東門內道左有魏征北將軍建成鄉景侯劉靖

碑晉司隸校尉王密表靖功加於民宜在祀典以元康四年九月二十日刊石建碑碑云魏使持節都督河北道諸軍事征北將軍建成鄉侯沛國劉靖字文恭登梁山以觀源流相灑水以度形勢嘉武安之通渠羨秦民之殷富乃使帳下丁鴻督軍士千人以嘉平二年立過於水導高梁河造戾陵過開車箱渠其過表云高梁河水者出自并州潞河之別源也長岨峻固直截中流積石籠以為主過高一丈東西長三十丈南北廣七十餘

步依北岸立水門門廣四丈立水過長十丈山水暴發則乘過東下平流守常則自門北入灌田歲二千頃凡所封地百餘萬畝至景元三年辛酉詔書以民食轉廣陸費不贍遣謁者樊晨更制水門限田千頃刻地四千三百一十六頃出給郡縣改定田五千九百三十頃水流乘車箱渠自薊西北逕昌平東盡漁陽潞縣凡所潤舍四五百里所灌田萬有餘頃高下孔齊原隰底平疏之斯溉決之斯散導渠口以為濤門灑漉池以為甘澤

施加于當時敷被于後世晉元康四年君少子驍騎將軍平鄉侯宏受命使持節監幽州諸軍事領護烏丸校尉寧朔將軍遏立積三十六載至五年夏六月洪水暴出毀損四分之三剽北岸七十餘丈上渠車箱所出漫溢追惟前立遏之勲親臨山川指授規略命司馬關內侯逢惲內外將士二千人起長岍立石渠修主遏治水門門廣四丈立水遏五尺興復載利通塞之宜準遵舊制凡用功四萬有餘焉諸部王侯不召而自至襁負而

起事者蓋數千人詩載經始勿亟易稱民忘其勞斯之
謂乎於是二府文武之士感秦國思鄭渠之績魏人置
豹祀之義乃遐慕仁政追述成功元康五年十月十一
日刊石立表以記勲烈并記過制度永為後式焉

水經注

臣等謹按晉書劉宏傳云宏字季和沛國相人父
靖鎮北將軍宏有幹略政事之才以舊恩起家太
子門大夫略遷率更令張華甚重之由是為寧朔
將軍假節監幽州諸軍事領烏丸校尉甚有威惠

為幽朔所稱以勲德兼茂封宣城公云云蓋即元
康四年建遏之人也史但言其於幽朔有威惠而
不詳其蹟其父靖又於史無傳觀水經注所載可
以補史乘之闕至元康為晉惠帝紀年元嘉為五
代宋文帝紀年中間相距一百三十餘載水經刊
本訛康作嘉今謹改正其他訛脫之處依舊本增
改者凡十有四字至靖父子所建之遏及碑皆不
可考矣

原高梁閘在西直門外迤北一里至元二十九年建名

西城閘

水部備考

原承安三年命勿毀高梁河牆從民灌溉

金史

原齊園在西直門稍右園盡則高梁橋矣園中海棠甚多西鑿一曲磴引橋下水灌之上作板橋亭邊有叢竹

燕都遊覽志

臣等謹按高梁河側之齊園今無考

原高梁河離西直門僅半里橋跨河上茲水源發西山

匯為西河東為小渠由此入夫內稱御河水急而清魚之沉水底者鱗鬣皆見橋北精藍基置歲四月八日為浴佛會四方來觀肩摩轂擊決旬乃已

長安客話

臣等謹按今高梁橋南北牌坊各一南之南面曰長源北面曰永澤北之北面曰資安南面曰廣潤度橋為

倚虹堂由此溯長河為

樂善園皆詳

苑園門

增高梁橋在西直門西半里跨高梁河

大清
一統志

原過高梁橋楊柳夾道帶以清流洞見沙石佛舍傍水

結構精密朱戶粉垣隱見林中者不可悉數

齊珂雪集

原水從玉泉來三十里至橋下夾岸高柳絲垂到水綠

樹紺宇酒旗亭臺廣畝小池蔭爽交匝歲清明日都人

踏青輿者騎者步者游人以萬計浴佛日重午游亦如

之

帝京景物略

增袁宏道高梁橋詩 節是祇園會 謹同曲水池 嬉童

歌串亂天女 鬢華隨是樹 皆停蓋 無波不泛卮 魚龍與

角觥樂事看人爲 來中郎集

原陸啟泓高梁橋作 冬郊未經雪 殘葉猶戀樹 山水

入高梁 淙淙橋下度 萬物靜相忘 豁然領竒悟 及此見

夙心 斜陽忽西暮 賁趾山房詩集

原朱茂昫清明日過高梁橋作 高梁河水碧 彎環半

入春城 半繞山風柳 易斜搖 酒幔岸花不斷接 禪關

看塲屢處掉 都盧走馬跳 九何事無却得丹

青尋好手清明別寫上河圖 石門遺稿

原至元七年建大護國仁王寺于高梁河十一年三月

寺成十六年八月置大護國仁王寺總管府二十二年

正月發諸衛軍六千八百人給護國寺修造

元史世宗紀

原文宗幸護國仁王寺遂汎舟玉泉蓋苗進曰今頻年不登邊隅未靖正當恐懼修省何暇逸遊以臨不測之淵乎帝嘉納之賜以對衣上尊即日還宮元史本傳

臣等謹按護國仁王寺今無考

原大德五年正月奉安昭睿順聖皇后御容于護國仁

王寺

元史成宗紀

原至治三年十一月勅會福院奉北安王諾摩罕像于

高梁河寺

元史泰定帝紀按諾摩罕蒙古語樸實也舊作那木罕今譯改

原虞集劉正奉塑記至元七年世祖皇帝始建大護國仁王寺嚴梵天佛像求奇工為之得劉正奉于黃冠

欽定四庫全書

金史卷九十八

師正奉先事青州杞道錄傳其藝及被召又從阿尼爾格學西天梵相神思妙合遂為絕藝凡兩都名刹有塑土范金搏換為佛者一出正奉之手天下無與比由是上兩賜宮女為之妻又命以官長其屬迨今四十餘年凡行幸無所不從今皇帝尤重象教嘗勅正奉非有旨不許擅為人造神象其見貴異如此正奉名元字秉元副之寶坻人年七十矣其官曰昭文館大學士正奉大夫秘書監卿道園學古錄

原又大護國仁王寺恒產之碑初至元七年秋昭睿順聖皇后於都城而高梁河之濱大建佛寺三年而成時裕宗在東宮襄善贊美所以奉慈闈尊梵王宏法海之盛心無所不用其極以佛法不徒行必依于人人不可以無食中宮乃斥糗奩營產業以豐殖之已而効地獻利者隨方而至物衆事繁建總管府統於內置提舉司提領所分治於外歲滋月積府之政日以懈田失故額租賦不登寺之基日以削至大元年皇太后翼扶明

聖慨然思述祖宗之德念昭慶順聖經始之仁罷總管
府建會福院以平章政事宣政院使阿卜呼移爾布哈
為會福院使綜核名實遣官分道約部使者集郡縣吏
申畫疆場樹識封畛歷四載始仍舊貫視常歲之入相
倍蓰焉凡經隸本院若大都等處者得水地二萬八千
六百六十三頃五十一畝有奇陸地三萬四千四百一
十四頃二十三畝有奇山林河泊湖渡陂塘柴葦魚竹
場二十九玉石銀鐵銅鹽硝磺白土煤炭之地十有五
粟為林萬九千六十一酒館一隸河間襄陽江淮等處
提舉司提領所者得水地萬三千六百五十一頃陸地二
萬九千八百五頃六十八畝有奇江淮酒館百有四十湖
泊津渡六十有一稅務關堤各一內外人戶總三萬七
千五十九實賦役者萬七千九百八十八殿宇為間百
七十五棧屋門十房舍為間二千六十五牛具六百二
十八江淮牛之隸官者百三十有三經界既正版籍既
一皇帝以為能稱孝養意進封阿卜秦國公辭上曰爾

欽定四庫全書

卷九十八

連事世祖乃累朝舊臣封以此母庸辭出制書親授之
皇太后樂其有成功也命詞臣載文勒石以垂永久嗚
呼一寺之政必得其人乃舉況天下之大四海之衆乎
同上 按阿卜呼蒙古語取也穆爾布哈義俱見前
舊作安善忽馬
兒不花今譯改

原水從高梁橋而西傍有極樂真覺諸寺臨之前廣源
閘節之上麥莊橋越之過橋為湖界以長隄湖在隄南
稻田豆場在隄北曰西隄者城西隄也隄行八九里龍
王廟廟之傍黑龍潭又行一里堤盡右有村上青龍橋
即玉泉山下也

帝京景物略

臣等謹按真覺寺詳載

苑園門

樂善園卷內茲不具錄

原極樂寺門外有二柳高拂天長條踈地可掃馬蹄寺

中有松亦佳

燕都游覽志

臣等謹按極樂寺今尚存碑二明嘉靖門立一為

大學士袁郡嚴嵩撰一無撰人姓名

原極樂寺去高梁橋三里馬行濃綠中若張蓋殿前有

松數株松身鮮翠嫩黃斑剥若大魚鱗可七八圍

滿碧堂集

原寺臨水有垂楊婀娜甚殿前四松遮蔭不見一人寺左國花堂花已凋殘惟存故畦耳堂左有三層臺望西

山惜樹封之

燕都游覽志

原寺成化中建中有牡丹園春日游屐恒滿園有高樓萬厯壬辰進士曠鳴鸞欲登之寺僧辭以久扃不便開曠不聽甫登樓火發曠與樓俱燼

春明夢餘錄

原萬厯己未夏予與崑山顧錫疇九疇華亭董象恒臣

樂過極樂寺柳陰結軌命酒賦詩予詩有連空碧草皆
游幕到處垂楊作酒籌之句九疇極為賞擊詩不足傳
俊遊則不易得也

明水軒
日記

增極樂寺在高梁橋西三里至元時建

畿輔寺
觀志

臣等謹按極樂寺元至元間建春明夢餘錄謂成
化中建當是重修

增高梁橋堤北數十里大抵皆別業僧寺低昂踈簇綠
樹漸遠間以水田界如雲脚下空距橋可三里為極樂

寺址寺天啓初年猶未毀也門外古柳殿前古松寺左
國花堂牡丹西山入座澗水入厨神廟四十年間士大
夫多暇數遊寺輪蹄無虛日袁中郎黃思立云小似

錢唐西湖然

帝京景物略

增極樂寺西有靈通觀雲林寺

五城寺院冊

臣等謹按靈通觀碑一明大學士葉向高撰天啓

三年立雲林寺後僧塔一上有石刻云臨濟正宗

三十四世開山建雲林堂上雲下浪本和尚塔弟

子實證立

增葉向高靈通觀記略 靈通觀者以祀靈官蓋賜號也觀在京師之乾方靈官嘗劾靈于文祖朝為國家所崇奉而秩祀其英爽變化神威燁赫具在舊碑中則茲觀之有舉莫廢宜也經始于天啓之孟冬落成于次年之仲秋天啓三年歲次癸亥仲秋立石

臣等謹按明葉向高記中所稱舊碑今已無存

原白石閘西至青龍閘二十里至元二十九年建

水部備考

臣等謹按白石閘之橋今尚存又有小白石橋在

白石橋稍西

原鎮國寺在白石橋

順天府志

臣等謹按白石橋之鎮國寺今廢

原致和元年三月命僧千人修佛事于鎮國寺

元史泰定帝紀

原駙馬都尉萬公白石莊在白石橋稍北臺榭數重古

木多合抱竹色蔥蒨盛夏不知有暑附郭園亭當為第

一 燕都游覽志

臣等謹按白石莊今廢

原萬駙馬白石莊有爽閣鬱岡軒翳月池

帝京景物略

原劉崇副白石莊萬都尉園作仙園宜秋色相將
夕曛松青新濯雨槐古舊侵雲竹牖池光合山樓石翠
分風簾遠韻在擬向
月中聞半舫集

原延壽菴在白石橋西二里殿宇精嚴其後高樓九楹
左右翼樓各五楹一啓西窓嘉木纖蘿紛敷翳蒼西山

隱映若以翠屏圍之

燕都游覽志

臣等謹按白石橋之延壽菴今廢

原大佛寺在西直門北三里寺後有高阜積土甃石為
之廣袤幾二里山上有真武祠踏青士女正月必先至

其地

燕都游覽志

臣等謹按大佛寺即大慧寺今存殿兩重

本朝乾隆二十二年重修前殿恭懸

御書額曰慧燈常朗聯曰妙示真如空色相淨開正覺
攝聲聞後殿供范銅佛像恭懸

御書額曰靈峰慈蔭聯曰潮音普覺聲聞界水觀中涵智
慧珠

原明正德癸酉司禮監太監張雄建寺于宛平縣香山

鄉畏吾村賜額曰大慧并護勅勒于碑寺有大悲殿重
簷架之中范銅為佛像高五丈土人遂呼為大佛寺嘉
靖中太監麥某提督東廠于其左增益佑聖觀于是合
寺觀計之殿宇凡一百八十三楹拓地田百二十一畝
蓋是時世宗方信道士而厭緇流內官惟恐寺剝之毀
故建道觀于其旁而寺後之山又有真武祠藉此以存
寺也寺之始建大學士茶陵李東陽為碑工部尚書湯
陰李鑑書之新寧伯譚祐蒙額其增置佑聖觀也大學

士餘姚李本撰文禮部尚書高安吳山書之成國公朱希忠篆額其後萬厯壬辰重修則太子太保禮部尚書

太倉王錫爵撰記

淶水亭雜識

臣等謹按成德淶水亭雜識所載寺傍之佑聖觀今已廢李東陽李本王錫爵三碑並無存者寺後之山及真武祠亦久廢

原李東陽墓在城西畏吾村

順天府志

臣等謹按李東陽墓今無考

原西涯墓在北京城外其家族姓漸微至以墓前白石碑搗碎與販鹽者拌和以賣吁可慨也
瓦釜漫記

增白石橋西有朝真觀

五城寺院冊

臣等謹按朝真觀有明碑三成化年間碑二皆都察院左都御史溫陽李賓撰萬曆四十三年碑一刑部雲南清吏司主事王文邁撰又

本朝康熙三十三年重修碑一太常寺少卿勵杜訥撰原出真覺寺循河五里玉虹偃卧界以朱欄為廣源閘俗稱豆腐閘即此閘引西河水東注深不盈尺宸游則

渚水滿河可行龍舟緣溪雜植槐柳合抱交柯雲覆溪上為龍舟駐處每通惠河水涸糧運不前則遣官於此祭禱請水焉

長安客話

臣等謹按廣源閘座

本朝以來頻加修葺恭值

聖駕經行於此地易舟始達繡漪橋至

清漪園詳見

苑園門

原廣源閘在西直門西七里至元二十六年建

水部備考

原英廟文宗兩朝御舟藏廣源閘上別港

燕石集

增乾隆三十六年

御製過廣源閘換舟遂入昆明湖沿緣即景雜詠 廣

源設閘界長堤河水遂分高與低過閘陸行纔數武換

舟因復溯東西 萬壽寺無三里遙牆頭高見繡旂飄

維新梵宇非崇佛都為今冬慶典昭 朱衣僧跪寺門

前不挂紫衣不透禪

向賜紫衣皆為透禪
褒嘉今逝無一矣

葛直進舟弗

返顧箇維調御証因緣 夾岸香翻永泰風無論高下

綠芄芃所希此後雨暘若未敢秋前說兆豐 水痕漲

落尺猶餘蒲葦根還泥帶淤

前月二十一夜雨過驟西
山諸水漲發以致昆明湖

水平堤即啓青龍橋尾間宣洩水勢隨落今所見葦根
之泥猶前日水痕也至其下游東城濠及閘河雖間有

漫口旋即堵築而北運河一帶堤岸完固無虞武清諸邑不致如去年之受潦差足慰耳 北運河消

隄岸固闕心慶未害苗畲 麥莊迤邐接長春

麥莊長
春二橋

名 平水無勞更易艚西岸營房初建置

昨歲議為火器
營兩翼各建營

房一區視健銳營之制運動旅居之演習大器因于隄西之南臨度地鳩工

無非惠衆俾安

身東岸墻臨聖化寺其中林木頗清幽晨涼圖趨歸

御苑更弗門前命繫舟

軋軋鳴榔過繡漪橋名昆明百

頃綠波披舟行十里詩八首却未曾消四刻時

一時八刻四刻

始半時也

臣等謹按聖化寺繡漪橋應載

苑園門恭讀

御製詩此八章乃由廣源閘易舟即景之作今仍以始

事為重謹載入廣源閘條

原何御廣源開望西山詩山水有佳趣景象在朝曦
晨倚河堤望曠然盡平原春輪寂已歇秋容聚復疏
峰互對立壑澗迅相奔行人穿露薄樵子出烟村陟嶺
遂及巖泝流得窮源詎詢世外樂聊辟區中喧
增朝真觀西有延慶寺

五城寺院冊

臣等謹按延慶寺凡明碑三正德年間勅諭碑二

崇禎癸未年重修碑一翰林院侍講清苑孫從慶撰

原鄭公莊在萬壽寺左度橋而南有亭在平疇亭外俱

稻田綠堤蓮芡蓋鄭戚畹園也

燕都游覽志

臣等謹按鄭公莊今無考

欽定日下舊聞考卷九十八

欽定日下舊聞考卷九十八舉正

征北將軍原書訛作征南 建成訛作建城 元康

訛作元嘉 王密表下脫靖字 漂水訛作隙且脫

水字 羨訛作美 丁鴻督軍士訛作督丁鴻軍士

潞河之別源也訛作黃河之別潢 暴發訛作暴

戾 潤含訛作潤合 孔齊訛作孔濟 修主訛作

修立今俱改

大城東門內條

欽定日下舊聞考卷九十八舉正

欽定四庫全書

史部

欽定日下舊聞考卷一百九十九

詳校官庶吉士臣范逢恩

檢討臣德生覆勘

總校官進士臣程嘉謨

校對官進士 臣趙 雯

滕錄監生
池大經

欽定四庫全書

欽定四庫全書
下學問考卷九十九

郊
甸

西九

原昌運宮太監張永建

行國錄

等謹按昌運宮在廣源閘橋之南乾隆三十四

年奉

勅重修門內為元天聖境有鐘鼓樓功曹殿中為元天

玉虛寶殿恭懸

御書額曰坎德尊嚴聯曰氣合沖虛尊水府靈昭赫奕
肅星綱後為神霄延壽寶殿額曰元虛至德聯曰
真宰無言神鼓盪元機莫贊妙生成最後為玉霄
上穹寶殿聯曰絳闕雲扶開詆蕩紫垣河繞引靈
長皆

御書恭立

御製詩碑二右

國書左漢書在玉霄上穹寶殿前明碑亭二一勅諭碑

一吏部尚書長沙李東陽撰皆正德六年立在鐘鼓樓後

補由三虎橋西行里許為天禧昌運宮初名混元靈應宮正德六年司禮監太監張永請於朝勅建至萬厯四十四年重修增置垣墉二百餘丈門廡百餘間督修者太監林潮也工竣更今名殿宇凡七重松栝二十三株栢二十株大皆合圍夾以雜樹上枝干霄下陰蔽地有二碑築亭覆之一為勅建碑一為大學士李東陽撰文

楊廷和書英國公張懋篆額俱正德七年立又一碑萬
厯中立副使劉效祖撰文宮之後則張永墓在焉

倚晴閣雜

抄

增乾隆三十四年

御製昌運宮詩 玉泉發脈注長河佛宇仙宮夾岸多

閱歲壽攸致不戒

此處以經回祿陸諸重修
至今始竣以落成瞻禮

一時重鼎

慶斯那高居上帝朝絳節願錫康年綏寶禾碑撫前朝

瑞肆橫去聲謬稱昌運運如何

補李東陽泥元靈應宮碑畧 國朝之制道院多以觀
名其名古屋者特為隆重在郡城者若朝天靈濟顯靈延
福而郊園之外惟昭應
及此爾 懷麓堂集

補興勝庵土人目為松林今松無復存者萬厯中所建
也後有藏經閣可眺西山東北有果園園中有亭曰衆
芳亭北砌石為流觴曲水其東有閣曰明遠春月桃杏
雜發登閣望之不異錦城花海也

人海記

臣等謹按興勝庵今尚存在昌運宮西半里許地
名松林莊見碑文中查嗣璉人海記謂土人稱庵

為松林誤也庵內明碑二皆萬厯四十五年立果園及明遠閣今皆廢

增萬壽寺稍西為三笑庵過此為麥莊橋

五城寺院冊

臣等謹按三笑庵相傳為明代舊刹

本朝重加修葺麥莊橋恭立

御製文碑亭碑陰恭鐫

御製詩

增

御製麥莊橋記 水之有伏脉者其流必長亦如人之

有蘊藉者其德業必廣濟水三伏三見黃河亦三伏三見此其大者矣如京師之玉泉匯而為西湖引而為通惠由是達直沽而放渤海人但知其源出玉泉山如誌所云巨穴歛沸隨地皆泉而已而不知其會西山諸泉之伏流蓄極溢涌至是始見故其源不竭而流愈長元史所載通惠河引白浮壺山諸泉者今不可考以今運河論之東雖西勾如俗所稱萬泉莊其地者其水皆不

可資所資者惟玉泉一流耳蓋西山碧雲香山諸寺皆有名泉其源甚壯以數十計然惟曲注於招提精藍之內一出山則伏流而不見矣玉泉地就夷曠乃騰迸而出潄為一湖康熙年間依金華宗之舊地建園於山之陽名曰靜明園之西乳竇淙淙如趵突者為玉泉總脉其餘沈然而泛濫於湖者不可勝數詩人比之垂虹之瀑及所云疏龍首而出之者皆妄也東流而為西湖則以居京師之西又明時有西湖景之稱乃假借夫餘杭

而倡說於璫豎耳折而南經長春麥莊二橋夾岸梵宇
頗麗其大者為廣仁昌運萬壽萬壽之左即為廣源閘
于是水有高下之分矣自閘東南行經白石高梁二橋
遂至城之西北隅分為二一由西直門外繞而南東又
東北以會於大通橋一由德勝門外繞而東南又東行
以會於大通橋其自德勝門西分流以入太平橋者為
積水潭為太液池分合有數道並環繞紫禁由東南御
河橋穿內城以出以會西來之水自大通橋以下至通

金天曰居人
州為閘五為橋三夫東南轉漕國家之大計也使由通
而車載背負以達於都門將不勝其勞則玉泉之利豈
非天地鍾靈神京發皇之禎符哉青龍閘非盛漲不啟
奉宸苑司其事蓋如尾閭之洩云爾麥莊橋為城外適
中之地特為之記而勒碑於是

增乾隆十三年

御製麥莊橋詩
新漲平堤好進舟
霽空風物報高秋
聞鐘背指萬壽寺
搖櫓溯洄西海流
送爽一天雲似縷

娛情兩岸稼如油石橋郭外經過屢試問常年得似不
增都城西有藍靛殿萬厯間始建西頂碧霞元君廟

譚往

臣等謹按長河麥莊橋之西為長春橋度橋為廣

仁宮供碧霞元君舊名護國洪慈宮俗稱西頂康
熙五十一年改今名正殿恭懸

聖祖仁皇帝御書額曰金闕宣慈

皇上御書額曰坤元廣毓聯曰蕃滋遍錫寰區福長養
宏敷雨露恩殿前恭立

聖祖御製文碑宮門坊楔內額曰泰岳同瞻外額曰坤
貞普育左右坊楔各一左坊內額曰安貞福地外
額曰弘育仙都右坊內額曰資元真境外額曰懷
保春臺皆

聖祖御書又殿內

本朝碑一

欽賜監生內官學教習徐珽撰明碑二一勅諭碑一護
國洪慈宮碑大學士朱延禧撰

增

聖祖御製重修西頂廣仁宮碑

天地之大德曰生在

四時為春在四德為仁易文言曰元者善之長也君子
體仁足以長人自古帝王茂對育物四海之大萬民之
衆以及昆蟲草木之微各遂其生者無非體天地好生
之德以流澤於無窮也易繫辭又言乾大生坤廣生則
是生物之功天始之而地更廣之蓋坤者母道也母道
主慈其於生物為尤近焉京城西直門外有西頂舊建

碧霞元君宮地近西山之麓直今西苑之西南所謂萬
泉莊者固郊畿一勝境也元君初號天妃宋宣和間始
著靈異厥後禦災捍患奇蹟屢彰下迄元明代加封號
成弘而後祠觀尤盛郭郭之間五頂環列西頂其一也
歲時既久陳跡都荒碑碣猶存榱桷弗整其謂安神何
歲在戊子發內帑命有司鳩工重葺之閱一載而落成
棟宇穹然垣廡翼然殿寢秩然丹雘燦然瞻拜其下者
虔肅有加焉朕于萬幾之暇亦往展禮仰祝

聖母之釐俯介生民之祉以祈純嘏以鞏皇圖願其額
曰廣仁宮羣臣請立石以紀之朕思仁之為道大矣擴
之可放六合約之止在一心先儒論仁謂心如穀種其
生之性即為仁故物物而有仁則生生而不已天地之
于人物父母之于子皆是道也朕君臨天下日以養育
羣生為念俾稚者得以長壯者得以樂老者得以安期
于生齒殷繁兵刑寢息民無夭札物無疵癘總以一仁
推之而有餘今獨于茲廟曰廣仁者蓋以元君之為神

有母道焉母道莫大於坤今之廟宮適位坤維元君其
佐坤之厚德以廣其仁使首善之區同臻壽域寰宇之
內永託慈庥斯神貺與日星共著而禋祀與金石常新
矣

增廣仁宮迤西有鑲藍旗護軍營房及火器營

旗冊

臣等謹按鑲藍旗護軍營房及火器營詳見官署

門

增廣仁宮東有關聖廟

五城寺
院冊

臣等謹按關聖廟乾隆二十一年奉

勅重修廟內明碑二一大理寺卿洪聲遠撰一無撰人
姓名皆萬曆十八年九月立碑稱是年二月龍園
厰公役王從智有神靈附體言神今在東八天可
告知人間其事頗涉誕不具錄

增聖化寺西北為巴溝村有延壽庵

五城寺院冊

臣等謹按聖化寺建自康熙年間近寺為北所為
含淳堂皆詳見

金匱縣志卷之二十九
苑園門巴溝村有巴溝橋

皇上命立碑以誌之巴溝橋東南與萬泉莊接壤其水
自南而北匯入

楊春園園即丹稜汧為明武清侯李銘誠清華園恭繹
御製萬泉莊記釐定水道所經至精至確足正朱彛尊
孫承澤諸家之謬全文謹載入

苑園門

泉宗廟卷後巴溝村之延壽庵相傳為明代舊刹

本朝重加修葺

增三教庵在萬泉莊

五城寺院冊

臣等謹按萬泉莊泉源隨地湧現乾隆三十二年
皇上始於其地建泉宗廟廟內之泉

錫嘉名者凡二十有八謹載入

苑園門其廟外之泉若大沙泉小沙泉亦皆立碣以誌
之自是水之由萬泉莊注巴溝由巴溝入

暢春園者其源流始大著至王嘉謨薊邱集蔣葵長安

容話諸書所載有東雒村西勾橋皆附近丹稜泝
之地伏讀

御製萬泉莊記

指示巴溝橋之南平地淙淙出乳穴者不可勝數與諸
書所載東雒西勾水入地中者相合

睿鑒周詳訪古者咸識所依據矣三教庵明碑一翰林
院編修朱天麟撰崇禎十五年孟夏開山住持鎮
叢立

增循高梁橋石道行西有五聖庵北有佑國元

聖廟天仙廟

五城寺院冊

臣等謹按五聖庵

本朝康熙四十二年重修有府尹錢晉錫碑僧同和碑
元聖廟有明嘉靖間鑪天仙廟前殿有康熙八年
尚書龔鼎孳碑明萬曆癸巳布政使左參政董文
案碑後殿有萬曆間尚書余繼登撰天仙聖母感
應碑

增董文察重修天仙廟碑畧 都城西直闕外高梁橋
天仙廟殿居形勝厥位面陽重修于嘉靖辛酉迄今三
十餘稔今上踐祚之十九年辛卯八月永寧宮端嬪生
皇五子明耳壬辰夏患疾疹虐告于天仙祈默佑甫浹
旬遂瘳感神中綏計葺新之命官鳩
工聚材卜吉經始不踰時而告竣

原廣通寺在巡河廠北崇基若一岡阜累級而升寺門
前繚以短垣寺四角有高樓可以眺望亦春遊一勝地

燕都遊
覽志

臣
等謹按廣通寺門額

聖祖御書又

御書正殿額二一日息心淨行一日慈燈普照正殿外

簷恭懸

世宗御書額曰福佑升恒殿前恭立

御製文碑

皇上御製廣通寺詩並恭錄於後巡河廠詳見下條

原廣通寺元之法王寺也內有二碑皆嘉靖中大學士
華亭徐階所撰餘姚李本書成國公朱希忠篆額碑稱
寺係至元間本刹住持賁吉祥建至明更額廣通內官

監太監田用御馬監太監梁經修之燕都游覽志謂崇

基若岡阜累級而升今去周行止二三尺耳

渼水亭
雜識

增

世宗御製廣通禪寺碑文 距郡城西關一里有橋跨

玉泉之東流橋西北平原塏夾舊有法王寺後改名廣

通

聖祖仁皇帝曾命興工修治

御書門榜仍其名復

賜殿榜二曰息心淨行曰慈燈普照

宸翰輝煌光照梵宇雍正十一年八月特發帑金重為
修葺越一月而竣事焉寺隣近城門當輦道往來者絡
繹其下故宜宣講教乘開導愚蒙使知生佛之不二身
心之本幻而悉入如如法門莫不優游於廣大無礙圓
通之境利益寧可限量歟夫衆生本無迷與不迷之分
蒙與不蒙之異由於妙明真性一念妄起而不自覺遂
妄逐諸有淪沒不返遂成生佛之岐而生佛之原實無

岐也先聖由是憫之而立言設教巧譬曲喻積至三藏
十二部無非欲使背覺合塵者皆背塵合覺而已然人
同此心心同此體本自清淨本自具足迷教之所不涉
淨染之所不干塵沙世界無有少間上下古今無有不
貫雖三藏十二部之文無一字離終無一字著也教不
云乎四十九年說法未曾有一字故雖講演而本無講
演修証而本無修証惟能因講演而識無講演起修証
而達無修証妙契真心圓修萬行則欣厭之情滅塵緣

之妄空一心即法界而自他之境胥忘法界即一心而
能所之見悉泯融般若智而無礙證菩提果以何難何
不可共臻廣大神通之域普續慧燈於無盡也歎

增乾隆七年

御製過廣通寺詩 門隱松篁天雨華驅車偶過梵王

家山僧想是蕭閒甚古鼎敲烟自煮茶 閒拋貝葉覓

雲門試問迦文旨若存會得經禪都是幻風幡公案不

須言

廣通寺舊為教
院後亦參禪云

欽定四庫全書

卷九十九

增徐階重修廣通寺碑畧 廣通寺實法王寺之別院也至元間圖明普教三藏法師然沙實哩沙節依于斯為誦經之所住持費吉祥建石以記其事至我朝餘二百年漸就頽壞太監黃錦重建之經始于嘉靖己未八月迄工于庚申三月嘉靖三十九年立石 按熙唐古特語火也沙肉也實哩義見前舊作謾沙室利沙克節依番姓也舊作沙津受今俱譯改

增俞兆歲重修廣通寺碑畧 都城西直門外乾隅有寺原名法王乃元至元間僧貴吉祥所建為三藏法師然克沙實哩宏法道場歷今四百年中經興廢詳載明大學士徐階碑記寺基塋夷左列堆堞右環西山而玉泉之分流禁藥者穿林漱碧沿洄寺門九衢塵土之外忽標清境焉康熙四十二年癸未冬延禧宮隨

蹕遇此憫其傾圯傳

命禪師實資移錫寺中議典復之舉師勸善鵬工十歷

寒暑成無量壽佛殿三楹前為天王殿後為大雄寶殿
左右環以十八阿羅漢再後為方丈各二十七楹為禪
堂為齋堂廚庫山門左偏復建茶房五間隆冬盛夏設
茶湯以給行者康熙五十一年三月十八日蒙

御書廣通寺額

天章彪炳與奎登同輝用勒石以誌勝因云康熙五十
一年歲次壬辰七月建

原巡河廠在高梁橋稍西門外臨流內環以渚水東西
兩軒東可待月西則諸山濃黛涵浴水光中都人多於

此遊覽

燕都遊覽志

臣等謹按巡河廠今為觀音庵庵舊名海潮庵為

巡河廠遺址見明潘潤民海潮庵記

增潘潤民重修海潮庵記畧高梁橋之海潮庵一名
巡河廠相傳為古刹也距都城不數十武佛殿禪房橋
梁園圃亭臺池沼無不具備左瞻北闕之祥光右挹西
山之爽氣碧水盈前茂林環後春則舉目皆深紅嫩綠
夏則當筵多出水芙蓉秋冬之交則丹楓映日翠荇牽
風雁落平沙鷗浮淺渚至于斯者靡不心曠神怡且佛
力靈通隨感輒應以故遊人佛子爭奔走焉凡欲登眺
西山之勝率以此為第一步歲既久寢就頽廢焚修
子通忠者四顧慨然于是廣募十方共釀鍍捐糗相率
樂助閭閻餘鳩工庀材顏者修廢者舉一旦煥然改觀
工既竣屬記于余是
為記萬曆丙辰孟夏

增廣通寺西為慈獻寺慈獻寺西為壽安寺

五城寺
院冊

臣等謹按慈獻寺相傳為明代舊刹

本朝乾隆年間重修後殿恭懸

皇上御書額曰法雲慈蔭壽安寺舊為萬壽隆昌寺後
改今名正殿恭懸

聖祖御書額曰功施草樹

皇上御書額曰壽者身聯曰禪燈光映長明月祇樹花
間不老枝

增馬家口有龍翔寺寺西有青塔禪院

五城寺
院冊

臣等謹按龍翔寺相傳係明刹鐘一有傳臨濟正宗磐山下第六世孫住龍翔寺實誠等字康熙五十三年造青塔禪院亦舊刹

本朝重加修葺正殿恭懸

世宗御書聯曰三春陌上霑時雨四野田間看慶成禪堂恭懸

聖祖御書聯曰城隅綠水明秋月海外青山隔暮雲正殿後三塔並峙旁二塔為普同塔中為大覺禪師

塔僧湛祐撰銘

增僧湛祐大懷禪師塔銘畧 京都青塔大懷禪師諱行敏不知何許人未辨姓氏聞師家居時夜夢梵僧指示遂出家繼染後徧訪知識始謁覺浪和尚于江左次參萬如老人于龍池未經一夏命居第一座晚抵燕都隱青塔者二十年終歲閉戶曾不知有門外事報緣已盡示寂于康熙二十三年二月十九日葬于城西之西村其弟子起琇過吾室索塔銘語合掌為之銘曰生本無生滅亦非滅無滅無生毘邪結舌空谷之聲虛堂暫歇吾師真常松風水月
康熙二十五年秋七月

增曾家莊有覺生寺

五城寺院冊

臣等謹按覺生寺雍正十一年

勅建殿內恭懸

世宗御書額曰慧照澄心

皇上御書額曰妙明正覺鐘樓額曰華嚴覺海禪堂額

曰般若真詮皆

皇上御書殿前恭立

世宗御製文碑碑陰恭勅乾隆二十九年

皇上御製詩寺內大鐘明永樂間鑄萬厯間從漢經殿

移置萬壽寺乾隆八年

皇上命移置茲寺內鐘樓前恭立

御製大鐘歌碑並恭載於後

增

世宗御製覺生寺碑文 朕惟生佛皆是空名迷覺無
非幻法如來不云乎但以假名字引導于衆生故三乘
六度菩提涅槃諸說悉為方便接引之法辟諸雲興太
清漚生大海雖空海所不拒實空海所不受也清淨之
性亦復如是而人方執身口意為實為貪恚癡是著如

清明眼受諸蒙翳妄有所見是以如來以名字言教之
藥藥之但使翳消更無別法便能了然於無住之性湛
爾無為之法蕭然非有非空不離不即尚無少法可得
烏容有可執之相哉故從無住以生心心無住以無
為而差別法法無為則空而不空不空而空幻而不幻
不幻而幻生佛亦然如是覺者名為正覺不如是者不
名為覺京師西直門外曾家莊有園址爽塏長林佳茂
此地右隔城市之囂左繞山川之勝宜為寂靜清修之

地用是肇建梵宇經始于雍正十一年正月告成于十
二年冬爰賜名覺生寺俾禪者主之參徒萃止振其大
覺之道達夫正覺之旨轉根本覺輪示無生覺相皆得
返迷為悟易若反掌即俗成真速于彈指使慧日恒明
真風長扇則此珠林香界詎非塵海之覺津歟雖然實
無覺者亦無覺之者以無覺之覺覺不生之生斯朕之
所謂覺生也歟

日講起居注官翰林院編修

臣

張若靄奉

勅敬書

增乾隆十二年

御製覺生寺詩 禪關郭外清小憩喜秋晴樹影疑翻
貝鐘聲偶發鯨塵心何處著畫意遶方呈一叩三乘演
誠哉善覺生

增乾隆二十九年

皇上御製覺生寺詩 侵晨奠靜安返蹕禮栴檀結習
鎮如此覺生良已難聊因甘雨足稍為悵懷寬調御無

憂喜金剛四句觀

臣等謹按覺生寺

御製詩始見於乾隆十二年又二十九年

御製詩恭刊於

世宗御製文碑後今並敬謹編入并恭載

御製大鐘詩歌各一章於後餘不備錄

增乾隆八年

御製覺生寺大鐘詩 雷紋隱篆蟲半字蘊洪銅

鐘上有法

華經
一部善吼周三界聲聞具六通橫粉為撞杵夏屋是乘
風待扣何須扣當前悟色空

增乾隆十一年

御製覺生寺大鐘歌用沈德潛韻
鼉謀弗善野戰龍
金川門開烈燄紅都城百尺燕飛入齊黃羣榜為奸凶
成王安在乃定案夾輔公旦焉可同瓜蔓連抄何慘毒
龍江左右京觀封謹嚴難逃南史筆懺悔詎賴佛氏鐘
道行儼被禁將命提榷治盡丹陽銅穹隆重過萬石廬

卽泥精鏤禪機鋒夏屋十尋虞不舉鯨魚盈方丈堪春
山靈水族無不具魑魅魍魎怪哉蟲欲藉撞杵散噴氣
安知天道憐孤忠榆木川邊想遺恨鳧氏徒添公案重
憶昔遨遊西海子水天上下玻璃空一川可通萬壽寺
黃緣偶挹曹溪宗喬松偃蓋假山古傑閣巍巍獨據中
洪鐘在懸洵偉觀連吟更喜昆弟從蒼黥其色蟠其紐
中宏外聳何隆隆華嚴字蹟傳沈度半滿全揭開羣蒙
覺生鹿苑

皇考創材飭內帑犀鳩工謂是善吼周沙界乃從舊寺

移乘風太清十里渺乎小日日演梵闍離宮

覺生寺去
圓明園二

十里十耘考已廓苾芻眼摩挲更暢騷人胸不離一步鐘如

是東西分別心猶蓬我惜德潛老始達其詩亦復倫考

功成編著作呈乙覽不間肯作蓀佯聾獨愛長歌踐其

韻非侈藻采爭雌雄載賡酬倡古弗廢詩話千載留芳

蹤聖經佛旨究異路將以何道訓成童於論於樂備法

物安可以此歸辟雖安可以此歸辟雖不如任彼出林

大且逢

末數語反
德潛詩意

增曾家莊路北有關帝廟

五城寺
院冊

臣等謹按曾家莊關帝廟鐘一有供入勅賜通惠
寺同結良因開山第一代住持本智等字明嘉靖
年間造殆後人移置茲廟者

增小泥窪有九華庵養老堂皇莊有藥王廟石道東北

關帝廟二石道西南關帝廟一

五城寺
院冊

臣等謹按九華庵鐵爐一明正德九年造後為養

金定邑志卷之九
老堂乃募緣養老疾者皇莊距南海淀二里許蓋
沿明代俗稱也藥王廟係舊址

本朝乾隆三十七年重修石道東北舊有隆福菴今門
內奉關帝像磬一有海甸皇莊隆福菴住持寶華
山比丘通倫誠獻等字後殿鐘一有錦衣千戶高
普名室趙氏妙得正德十三年造等字其旁舊有
茶棚今亦奉關帝土人稱雙關帝廟石道西南廟
內有已斷石額刻關帝廟三字旁字云辛巳六月

吉日立年號已漫滅鐘一有錦衣衛指揮張明信
官張鸞等字正德七年造鑪一萬歷三十四年造
磬一有西直門外皇莊關帝廟邱世明造等字

增南海淀有永通寺清梵寺天仙廟真武廟白衣觀音

卷三聖菴

五城寺
院冊

臣等謹按永通寺明碑二一勅賜永通寺名額碑

一重修碑大學士徐階撰俱明嘉靖年間立清梵

寺前殿恭懸

聖祖御書清梵寺三字額大悲壇恭懸

世宗御書額曰慈天廣祐乾隆二年

皇上頒賜藏經全部天仙廟明碑一翰林院編修濟南

沈淵撰隆慶六年立真武廟舊為三官廟

本朝重加修葺白衣觀音菴一明萬曆甲寅年造

本朝重修碑一康熙六十一年立三聖菴鑪一有正德

五年勅賜靈佑宮供奉等字殆後人移置茲寺者

本朝重修碑一雍正十一年立

增南海淀之東有正藍旗護軍營房

旗冊

臣等謹按正藍旗護軍營房制度詳見官署門

增南海淀之東二里許有保福寺東柳村有長壽寺觀

音菴

五城寺院冊

臣等謹按保福寺鐵鐘一明萬厯三十九年造寺

後塔一石刻云欽依內經廠提督僧錄司左善世

兼大興隆寺仍兼大聖壽寺開山鼎公禪師靈塔

又諭余僧丈鼎碑一正德十一年立長壽寺鐵磬

一有勅賜瑞光寺供奉等字殆後人移置茲寺者
觀音庵鐵鐘一有觀音庵住持寧惠惠善嘉靖三
十九年造等字

增陳府村有內務府包衣三旗營房

旗冊

臣等謹按內務府包衣三旗營房詳見官署門

增陳府村有紫竹林碧霞宮太平庵

五城寺院冊

臣等謹按紫竹林碧霞宮皆羽士居之碧霞宮鐵

磬一有嗣教弟子郭慶元萬曆二十八年造等字

太平菴相傳係舊刹

本朝重加修葺

增度紅橋而北為

圓明園

宮門前有湖曰前湖乾隆二十八年濬湖西岸恭立

御製前湖詩碑湖中置堤自北而南治石道東岸亦有

石道

五城冊

臣等謹按南海淀迤北是為

暢春園考王嘉謨薊邱集蔣葵長安客話諸書所稱北
海淀丹稜汧實當其地

暢春園迤北舊有前華家屯後華家屯

世宗憲皇帝潛邸時

聖祖賜園於後華家屯

賜額曰圓明園後遂為

駐臨視事之所

皇上御極以來

紹庭繼志因而弗改規制之詳謹具載

苑園門茲卷惟敬識

宮垣以外凡湖河橋閘旗營官舍之屬周環布列者並
依現在方位制度標舉大凡以昭

盛時之軌躅焉

又按紅橋河水從

暢春園西北門五空閘流出垣外在

圓明園宮門之南迤邐東注稍折而北流經

長春園大東門外石橋合

御園諸水趨清河會沙河以入白河

增

圓明園紅橋河側有總管八旗及三旗護軍印房

冊

臣等謹按總管八旗及三旗護軍印房制度詳見

官署門

增

圓明園宮門左有慧福寺善緣菴

宮門右有泰山聖母廟

五城寺院冊

臣等謹按慧福寺舊名清芳菴雍正年間

世宗憲皇帝賜額曰慧福寺土人亦稱關帝廟以寺內供關帝像也善緣菴相傳保舊刹

本朝重加修葺泰山聖母廟俗稱娘娘廟康熙年間建增華家屯有前大樹菴後大樹菴觀音菴

五城寺院冊

臣等謹按前大樹菴相傳古柳一株今無存後大

樹菴

聖祖御書額曰

勅建大樹菴觀音菴在大樹菴東係

本朝建立

增

圓明園西北門外蕭家河橋西有延福禪林地藏菴

五城

寺院
冊

臣等謹按蕭家河舊有橋闌今仍其制其水由青

龍橋來東北流繞

圓明園後約三里許至車房村合紅橋河水並

御園內外諸河水又三里許入清河以歸白河焉延福

禪林門內供關帝殿內供泰山聖母相傳係舊剎

本朝重加修葺地藏菴鐵鐘一明弘治十七年造

增蕭家河北有正黃旗護軍營房樹村西有鑲黃旗護

軍營房東有正白旗護軍營房

旗冊

臣等謹按正黃旗及鑲黃旗正白旗護軍營房制

度詳見官署門

增樹村有五聖菴觀音寺

五城寺
院冊

臣等謹按五聖菴正殿供泰山聖母鐵磬一有徐
沔合家眷等誠造地藏菩薩殿內供奉萬曆二十
八年住持僧如禮等字今殿內並無地藏像或係
他處移置茲菴者其西為五聖殿鐵磬一有明直
隸真定府冀州邢任棗強縣邢亮等字觀音寺前
殿院內鐵鐘一有天啟六年住持比丘僧道深造
等字

增

長春園東北有鑲白旗護軍大營房其東有鑲白旗護

軍小營房

旗冊

臣等謹按鑲白旗護軍大營房及鑲白旗護軍小

營房制度詳見官署門

增

長春園大東門外大石橋有關帝廟西北里許地名二

河間亦有關帝廟

大北門外前營有三聖菴

五城寺
院冊

臣等謹按大石橋及二河閘關帝廟二并三聖菴

皆係

本朝建立

又按大石橋之北有新開水田畦畛彌望詳見

苑園門

欽定日下舊聞考卷九十九